



## 客家語現代詩 教師組第一名

### 花樹手記（四縣腔）

#### 杧仔樹

日頭越烈 佢越開花  
結恁恁个果子歡迎細人仔放暑假  
跋佢 搨佢 搖佢  
猴仔樣在樹極頂溜上溜下

跋樹个人一隻隻飛走了  
杧仔樹還係年年開花  
麼儕記得 輒輒來轉屋  
噍<sup>1</sup>等甜甜个果子過暑假

黃熟个杧仔跌落一地泥  
樹仔漸漸老忒了 童年  
漸漸行遠了

#### 蓮花

一枝咖啡 配一蕊卵餅  
一葉報紙 恁一圈遠方个大事  
顛來倒去 目珠乜毋會眨一下  
偲个一萬一千零擺早朝<sup>2</sup>

生活个味緒 淡忒了  
你个面皮 分時間讀老了

啲等冷冷个咖啡  
睺啊過一隻黃蝶仔 啊 偲个細花園  
一支紅蓮在思想个爛泥肚  
直直伸起來

### 臺灣欒樹

一條條彎幹路脣个絲巾  
圍在秋天个頸根項  
淙黃點著天空以後  
千萬盞細燈籠緊曠緊光  
緊曠緊光  
秋天个溫柔定定仔焙  
定定仔 嬌嫩个水紅  
歡喜个橙 還有分人穩安个茶色  
在寒天打激顫以前  
燒暖佢个燒暖

### 油桐花

拚毋贏春兩個誘惑強強爆開个  
著癌个壁  
一日開出一蕊花  
一日開出一蕊愁慮  
  
外背个花也開了 你看  
  
白雪雪 雪白白  
歡歡喜喜遶過  
一山又一山

### 咸豐草

高貴个卑微

平凡个驕傲  
從來毋係嬌嬌女 分爺哀縱到上壁  
乜會用自家个方式  
挺過四季寒熱  
生遍路脣荒野  
開自家个白 展自家个香  
一針一針 射向往來个人客  
在百花个版圖  
長壽耐命

## 作者註

<sup>1</sup> 噍：音 ceu；嚼。

<sup>2</sup> 早朝：音 zo` zeu'；早餐。

## 作者感言



徐碧美 國小老師

感謝評審，得獎真歡喜。

感謝阿姊，獎金送分佢。

感謝自家，不老个心。